

Protocol no. 120
Sezzüda da lündeschdi, 14 november 2011 – 20.00 – 23.00

Preschaints: Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Claudia Luppi (protocol)

Protocol

Il protocol no. 119 da la sezzüda da lündeschdi, 7 november 2011 vain approvà.

1069 021 FABRICA
Instituziun terapeutica per umans cun bes-chas sco mezs da terapia

Avant ün temp s'ha duonna Ruth Bayerl infuormada a regard las pussibilitats da pudair realisar a Sent ün'instituziun terapeutica per umans cun bes-chas sco mezs da terapia. Per tilla pudair spordscher man in quista dumonda, ha il Cussagl cumünal invidà a duonna Bayerl per ch'ella possa spiegar cuort l'idea dal proget.

L'idea fundamentala da duonna Bayerl es da pudair tegner üna pitschna scossa asens (trais fin quatter) in üna stalla cun serragl our il liber e cun pussibilità d'abitar in vicinanza. Ils asens gnissan lura instruits per la lavur cun paziants impeditis o dafatta cun paziants cun chüra paliativa. L'intent nu füss però da spordscher eir stanzas per terapias staziunaras d'impersè da lavurar sül lö cun paziants ambulants opür da transportar las bes-chas per la terapia paliativa al Center da sandà Engiadina Bassa ingiò cha duonna Bayerl lavura sco meidi directiv d'anestesia. Il Cussagl cumünal piglia cogniziun da las spiegaziuns da duonna Bayerl e decida da dar inavant l'acta cullas infuormaziuns sur da quista sporta terapeutica eir al Cussagl cumünal nouv.

1070 9 FINANZAS ED IMPOSTAS
Preventiv 2012

Il Cussagl cumünal ed ils schefs dals decasteris repassan il preventiv pel 2012 da las investiziuns e dal quint curraint in fond amo correcturas ed adattamaints. Il total da las investiziuns es considerabel. La prosma sezzüda da preventiv es prevista insembel culla cumischiun sindicatoria ed il Cussagl cumünal nouv. Il termin vain fixà sün lündeschdi, ils 28 november 2011 a las 13.15 in chasa Misoc.

1071 021 FABRICA
Jon Lansel – Isolaziun dal stabilimaint agricul utilisà sco magazin, Palüzot

Sco protocollà i'l protocol no. 119 da la sezzüda dals 7 november 2011 fa sar Jon Lansel la dumonda al Cumün da pudair isolar il stabilimaint uriunt agricul ed utilisà uossa sco magazin. La gistessa dumonda ha'l inoltrà svessa eir a l'uffizi per il svilup dal territori dal chantun Grischun. La resposta da quel uffizi es entrada cun data dals 10 november 2011 a man dal Cussagl cumünal. Tenor l'uffizi per il svilup dal territori dal chantun Grischun admetta la ledscha da dar il permiss per müdamaints d'adöver per stabilimaints dadour la zona da fabrica unicamaing culla cundiziun chi nu vegnan fats müdamaints vi dal fabricat. L'uffizi chantunal propuona perquai al Cumün da dar resposta a la dumonda da sar Lansel in sen negativ, uschè cha'l Cussagl cumünal nun ha plü la libertà da decider otramain.

1072 021

FABRICA

Maria Benderer – Refabricaziun da la puntinada pro la stalla, Tuffera 297 D

Duonna Maria Benderer fa la dumonda da pudair refar our da motivs da sgürezza la puntinada vers nord da la stalla giò Tuffera ch'id es in ün nosch stadi. La dumonda vain trattada in procedura d'annunzcha. Il Cussagl cumünal decida da dar il permiss per la renovaziun da la puntinada.

La taxa da trattamaint importa frs. 50.—

1073 021

FABRICA

Men Zanetti – Stallina per giallinas naninas cun suottet e saiv

Sar Men Zanetti fa la dumonda da pudair plazzar üna stallina per giallinas naninas i'l lö ingiò ch'el vaiva üna jada la stallina dals cunigls. Causa cha eir tschels stabels cun suottets e saivs han be ün permiss provisoric limità fin la fin da december 2014 decida il Cussagl cumünal d'aderir a quista dumonda culla cundiziun cha eir quista stallina vegna levada cur chi scrouda il permiss. La dumonda vain trattada in procedura d'annunzcha.

La taxa da trattamaint importa frs. 50.—

1074 151

TIR DA SCHAIBGIAS

Adattamaint dal reglamaint pel tir da schaubgia Parnarsura

Causa cha l'utuon vegna la saira fingià bod s-chür nu cuntaintan ils uraris tenor l'art. 4 a) dal reglamaint pel tir da schaubgia Parnarsura. Il Cussagl cumünal decida perquai d'adattar l'art. 4 a) dal reglamaint seguaintamaing:

Art. 4 a) I das-cha gnir trat be d'ürant ils seguaints uraris:

nouv	dals 1. mai fin als 30 settember	il mardi e'l venderdi da las 17.00 – 20.00
	dals 1. october fin als 20 december	il mardi e'l venderdi da las 15.30 – 17.00
	d'ürant l'avuost fin al cumainzamaint da la chatsch'ota implü	la sonda da las 9.00 – 12.00

1075 622

GRUPPA DA MANTEGNIMAIN

Müdamaint dal contrat ad uras al contrat al mais

Il schef da fabrica orientascha cha sar Jon Andri Schmidt lavura figià daspö ün ter temp cul pensum plain d'üna piazza da 100%. Fin uossa gniva el pajà ad uras. Il schef da fabrica propuona da far giò a partir dals 1. schner 2012 ün contrat cun paja al mais. Causa cha pel Cumün nu resulta finanziaimaing ün grond müdamaint cun quist adattamaint dal contrat da lavur, decida il Cussagl cumünal da stipular per sar Jon Andri Schmidt pels 1. schner ün contrat cun paja al mais.

L'actuara: